

瑜伽師地論敘卷下

十支弟四

說十要已。次說十支。十支者。如人有身。必有其足。乃稱六足。如木有本。必有其支。遂爲十支。足以扶身。支以輔本。發智不詳。充於六足。大論不及。資於十支。一百法。二五蘊。三攝論。四雜集。五分別。瑜伽。六辯中。邊。七二十唯識。八成唯識。九莊嚴。十顯揚。

一百法。明門論者。略錄本地。分中名數。而以一切法無我爲宗。一切行無常。一切行苦。一切法無我。涅槃寂靜。四盟。椀南是稱法印。然無常故苦。苦故無我。無

我卽涅槃法印。雖四宗趣唯一。故但說一。初地百法。二地千法。以次無邊。爲一切法。然聞思教體。見道爲極。略修增上。故但說百。攝事分中。本母事先略序事。一者心事。二者心所有事。三者色事。四者不相應行。事。五者無爲事。然有其目。而缺別文。故復造論。自性相應。所緣分位。及與清淨。五惟一識。攝一切法。人法無我。惟是識故。故屬唯識。是爲百法明門論。以一切法無我爲宗義。

二五蘊論者。略攝本地分中境事。而以無我唯法爲宗。契經九事首蘊處界長夜淪迷執一實我。世尊方

便俾認爲法是故十二分教均以六善巧爲宗。破一性我。說爲積聚而非是性。蘊且有五而豈惟一。破受者我。但識生長處且十二。破作者我。任運而持無作用性。說名爲界而有十八。是故百法以識攝法。法亦是識。五蘊以蘊攝識。識亦是蘊。百法唯識。識卽是性。但說名數。五蘊法相。相各有性。故詳說性。攝事分中本母事後廣辨事。所治能治有十四對。此論復次略其所詳。故唯十二。是爲五蘊論以無我唯法爲宗義。三攝大乘論者。括瑜伽深密法門。詮阿毗達磨攝大乘一品宗要。而以簡小入地爲宗。依正教文。一阿僧

祇授十地經。世親證明得定。將入見修。聞十地經。涕  
淚悲泣。無著授此。俾之作釋。是故簡小入地。於此獨  
詳。佛由菩薩修道而成。菩薩多聞熏種而入。幸福無  
邊。逢茲妙典。一切且置。應此鑽研。一華嚴教海。非此  
不入故。二薄伽梵十殊勝語。因果始終開示明白故。  
三獨標所知大所乘故。漏無漏種。共此所依。舍對治  
外。無他謬巧故。四建立賴耶爲大王路。一切智智大  
所乘故。五攝三性於唯識。唯識妙義。此獨詳故。六能  
入唯識。加行見道爲最近故。所入唯識方廣十事。平  
等六度爲因。增上六度爲果故。如是能入所入。詳詮

入義大所乘故。七修道差別法。爾次第。初地爲得。十地成辦。華嚴修因正詮。唯此大所乘故。八別顯六度。約立三學。三學增上。大所乘故。九斷謂無住涅槃。大所乘故。十智謂三身。大所乘故。如是十義。顯示此論爲大王路。爲燭幽炬。勝利無邊。不可說言。誰有智者而不鑽研。復次十支之中。攝論最勝。百法五蘊。略不及詳。故雜集法相。博不及要。故分別瑜伽。但釋止觀。六度三學。此獨詳。故辯中邊論。明中道義。對惡取空。此明十地。正詮所修。故二種唯識。立破推廣。提挈綱領。此最宜。故莊嚴詮大意。在莊嚴。此論詮大意。獨在

入故顯揚詮教意重聞思。此詮入地意重修慧故。是爲最勝。應此鑽研。是爲攝大乘論以簡小入大爲宗義。

四雜集論者。括瑜伽師地論一切法門。集阿毗達磨經所有宗要。而以蘊處界三科爲宗。一者宗證據阿毗達磨弘文未譯。然師子覺言。本論依經括義理盡。斯則就論討宗。卽彼經要。窺法師言。此論初明三科。卽以三科爲宗。以是因緣說宗證據。二者宗體義。此論八品。先本事分明三科體。後抉擇分明三科義。境必有體。本其體曰三法。充其體曰攝。順其體曰相應。

得其體曰成就。約前四品是三科體爲所觀法。依境起行。通行義。抉諦妙行義。抉法行必有果義。抉得慧解利他義。抉論議約後四品是三科義爲能觀法。以是因緣說宗體義。三者宗利益善三科義於一現境隨其所樂心易安定。於一切境無不如量正慧圓通。是爲止觀利益善三科義。思擇決定於諸異論得無所畏。是爲論議利益。阿毗達磨問答決義。是彼所事。故立論品。敘次篇終。以是因緣說宗利益。四者宗對治。或愚迷心總執爲我。以蘊對治。一爲色法。三爲心所。一爲心王。或愚迷色總執爲我。以處對治。非色有

二色處有十。或迷心色總執爲我。以界對治。色界有十。心界有七。色心界一。上根聰利。但說於蘊中根說處。下根說界。詳諸經論。有五善巧。六善巧。七善巧。十善巧之建立。此獨說三根本立故。以是因緣。說宗對治。五宗廣略。色識所攝於蘊門中略而爲一。於界處門廣開十七。受想行攝法界法處略而爲一。於蘊門中廣開爲四。又蘊惟有爲界處及無爲能取所取處。惟顯生界則及體。以是因緣。說宗廣略。以上說宗。以下說義。六瑜伽法門。六善巧義。五識意地本地決擇。應知其相對法括之。敘三法品建立門。有非有等五。



十八門思所成地。聲聞地應知其相。對法括之。敘三法品六十義。廣分別門。情器雜染意地。尋伺地應知其相。寂靜覺分。聲聞地應知其相。對法括之。敘諦品諸相法門。菩薩地所學法。對法括之。敘法品方廣十事門。菩薩地如是學。對法括之。敘得品現觀法門。菩薩地能修學。對法括之。敘得品補特伽羅門。因明詳於聞所成地。對法括之。敘論品諸相法門。以是因緣。說瑜伽法門。七瑜伽異義。經論會違。詳陳可考。繁文不述。略舉方隅。色蘊廢立。色二十五。瑜伽減一。聲十。有一。瑜伽二。四。香。六。瑜伽唯三。味。十二。瑜伽唯九。觸。

三十二。瑜伽二十。法處所攝色五。瑜伽或二或三或四。想蘊分六。瑜伽總二。行蘊心所本惑開十。立五十五。瑜伽五三。不相應行立二十三。瑜伽二四。是爲三法品中略舉廢立義。苦諦義二。瑜伽義五。集諦煩惱緣起惟三。瑜伽有六。煩惱差別立二十五。瑜伽二七。故思造業。建立有五。瑜伽惟二。十八思斷業。欲修九無閒。此論斷三。瑜伽斷二。道諦九根。四受隨一。瑜伽無憂。惟三隨一。是爲諦品中略舉廢立義。菩薩藏中。此論希法說有其二。瑜伽方廣說惟其一。是爲法品中略舉廢立義。以雜集之異。瑜伽顯。瑜伽之殊對法。

古學今學源流可徵。以是因緣說瑜伽異義。八部執所歸。四阿笈摩屬本事分。阿毗達摩屬抉擇分。本事敘九事。抉擇故三科。本事轉諦輪。抉擇故觀諦。本事通三乘。抉擇故收小。是故雜集俱舍。大小對法。約義多同部。執競興。婆沙。翹實。蘊處。唯假。經部。義長。世親。賓主。抑揚。造俱舍論。其所樹義。若聚集。因是假義。若無爲。不立蘊義。方諸雜集。種種不殊。正理一破。朋迴有部。雜集一救。遂入大乘。眾流匯極。江漢朝宗。然此假實。厥惟六種。一聚集爲假。非聚則實。二因於未來。名爲假有。現見爲實。三果無其體。施設名假。有體爲

實四所行謝滅唯念爲假現事爲實五分位爲假自  
性爲實六觀待爲假一切隨轉乃得爲實是六假實  
大小共許展轉立破由麤入細如量爲至法相所事  
以是因緣說部執所歸九異門說有依他起性執爲  
偏計不執圓成是故假實有外立勝義有識種爲界  
識生爲處處界是識識如幻相一切皆假是故不獨  
蘊義假有爲假處界實有世俗爲實以如幻義無不  
皆假是爲三法皆假以異門義說如幻有是爲入法  
無我遠離二邊惟大獨有以是因緣說異門說有十  
眾義所聚此論名集諸聖所集不獨無著集諸經論

不獨達磨無著達磨稱舉其最。糝師子覺安慧標雜。以是因緣說眾義所歎。大哉此論古今之異軌。小大之通途。經論之雜糝。羣聖之會萃。義廣而賅備。文約而整齊。汪若望洋。昭若揭日。誰有妙典博。大簡明。一至於此。欲入教海。多聞聞持。大漠指南。不迷所向。以是因緣。智者應學。是爲雜集論。以三科爲宗義。

五分別瑜伽論者。弘文未譯。然無分別一心爲止。有分別多心爲觀。深密經中分別瑜伽品說止觀義。攝論第六教授三頌。引論所說皆止觀事。是爲分別瑜伽論。以止觀爲宗義。

六辯中邊論者。敍七品以成瑜伽法相。而以中道爲宗。有虛妄分別。乃有依他。有是依他。乃契中道。契乎中道。乃成法相。九相顯已。空性方談。此論宗法相。故先之於相。境體爲相。境用爲障。五障障九。結障十。因三十七覺分十度十地障種種所障。令智不起。豈其虛妄本性皆空。故次之於障。依境起行。觀十真實。唯識無相。一切如理。法相談相。一切如量。是故瑜伽中邊俱詳真實。此有其十。初一能顯。謂三根本。次九所顯。謂三相四無倒。四諦二諦。二極成。二障斷。五法攝。三性。七眞如。十善巧。如量觀行。必除我見。故次之於

眞實相行眞實障行對治。覺分修。三品修。大小別修。修生對治。非任運有。故次之於對治。久觀久修。必有深淺。於法差別。有十八位。及與三位。於有情別。而有七位。故次之於分位。因行既圓。果始足感。五果十果。三乘通得。故次之於得果。通果平等。別果無上。故終之於無上乘。無上乘者。一由十二最勝。有十度作業。二以三慧能觀。思十度作意。三以六無亂。修止十無倒。修觀。金剛十句。於此詳明。四以十五邊義。顯詮申道。五以平等差別。詮大小乘異。是爲正行五相。次敘所緣。有十二相。次敘修證。有其十相。是謂無上乘諸

相。此論七品詮表法相簡惡取空。中道權衡邊執屏斥。文不他及。義亦精嚴。境行果三章次賅備。爲法相之要典。例攝論而堪弘。是爲辯中邊論以中道爲宗義。

七二十唯識論者。釋七難以成渝伽唯識。而以唯識無境爲宗。一釋四難。夢則時有一定。處有一定。作用能成。鬼則人不一定。而實無境。又以獄喻四事皆成。而實無境。獄卒旣非眞實。有情亦非心外大色。更非造業在內。受果在外。受果非外者。教依識種密意說。根依識現相密意說。塵了知唯十二處都無有人。則



人我執空。若能更知處。唯是識。都無有法。法我執空。然法空密意。遣徧計有。離言法性。非撥爲無。以是因緣。境無識有。唯識義成。以是因緣。非有分色。非極微。非和合。非和集。識外俱非。成唯識義。二釋所證現量難。同時意識。雖是現量。一刹那後起心。分別證知。此現見。既過去。色亦非今。證境分明。故非現量。非現量。境於理爲無。以是因緣。成唯識義。三釋不知難。夢境非有。覺而後知。大覺證真。方知唯識。凡夫不知。依聖言量。以是因緣。成唯識義。四釋友教難。但詮心內自識。所變非遮。心外他識有情。自他展轉互爲增上。令

各自識變自似相。既非外境而有外識。善巧無邊。成唯識義。五釋夢無果報難。夢劣無果。覺勝致報。非由外境。唯識義成。六釋意業無罪難。如鬼念力令人得夢。彼識轉變。令此命斷。故無身語業而得其罪。意罪爲大。唯識義成。七釋他心智難。法執所蔽。他心如自。皆不如實。非若佛智離言稱量。由不如實似外境現。而實非境。以是因緣。成唯識義。如是七釋。唯識成立。妙義無邊。方隅略示。是唯二十唯識論。以無境唯識爲宗義。

八成唯識論者。廣詮瑜伽境體。而以識外無別實有。

爲宗對法廣詮法相。此論廣詮唯識。賅攝汪洋。堪稱  
兩大。然對法獨詮正義而略別破。此論凡一樹義正  
別俱詳。是故欲治此論。須分兩事。一正義事。世親既  
釋攝論。抽所授義。別廣唯識著述未終。而生觀史。十  
家造論。言人人殊。糝會貫通。獨宗護法。故護法義是  
正義。折中取捨。權定基師。或初無有義理教極詳。後  
言有義理教獨略。勝者在初。或前略後廣。而皆有義  
勝者多後。或理教齊等。前後有義。取捨任情。如是披  
尋護法餘義。亦爲正義。二別破事。外道九十六大者  
十三。數論勝論。聲論。月論。離繫邪命。順世。梵天。諸如

是等或譯專籍或載牘文。小乘有部所繫由薩婆多而經部而正理而成實俱舍等。餘部所屬若正量大眾一說化地等。諸多部執或詳專籍或載牘文所破不明能破不立外小未晰。此論難通無著濟龍樹之窮護法糾清辨之失。安慧或朋清辨難陀親而未精。是則大乘空宗本宗諸德皆所悉究不厭求詳大哉。此論誠所難言。今姑逐文約略其概。異生迷謬執離心外別有實境妄計二取爲真爲實。大悲除執說唯是識。是故最初廣詮識相卽依他起。雖知此心虛妄顯現而未了達真性是何。若未知真烏能別妄。是故

次初明唯識性。卽圓成實。入此唯識。斷妄證真。非少修行可能圓滿。故次第三明唯識位。卽十三住。且初識相門。先明宗要。後廣識相。先明宗要者。離識而外。無別實人。識種與法互熏習。故有憶識誦習。心心所法。因緣力故。有造業受果。身心相續。煩惱厭患。故有生死涅槃。諸不如是。執有實我。種種安立。是故有過離識而外。無別實法。色法之中。其有礙色者。識變似相。爲所緣緣。見託帶彼。隨量頓生。本來虛脆。爲破此麤色。假立彼極微。其表無表色者。以心爲因。識變似手。轉趣餘方。似有動作。假名身表。以心爲因。識變似

聲生滅相續似有表示。假名語表。依思或願善惡分位。假立無表。不相應行中。依彼諸法可成分位。假立成就。依彼身心相似差別。假立同分。依業引生識種功能住時決定。假立命根。依損心種及伏麤動分位差別。假立二定。依法因緣本無。今有暫有。還無表異。無爲。假立四相。依語聲分位差別。假立名。句。文。身。無爲法中。一依識變。假施設有。二依法性。假施設有。是則一眞法界有爲無爲。一切皆假。唯是識變。諸不如是。執有法我種種安立。是故有過。然心心所依他起。故亦如幻有。遣心外境。說唯。有識。若執識實。亦如法。

我是故有過。如是爲明宗要。後廣識相者。初能變相。二所變相。三理教無難相。相十二門。自相因果所依。所緣行相相應。五受三性流轉伏斷。及與界地。如是諸門八識。則以十門分別。七識九門。六識八門。賴耶末那。教理建立。依據瑜伽。及與攝論。而更加詳。賴耶五教。對法深密楞伽莊嚴。四爲大乘。阿含通小。賴耶十理。持種執受壽煖識三。受生命終無心滅定。五義見於瑜伽。異熟食體趣生體。名色依染淨依。五義見於攝論。賅攝廣備。惟此論明。末那二教。楞伽惟大。解脫通小。末那六理。不共無明。六識二緣。思量名意。二

定無差。無想無染。我執不有。如是六義。亦攝論有。是爲異熟。思量了別。三能變相。此三能變。變於見相。見爲分別。是爲能取。相爲所別。是爲所取。二取之外。無別實有。由教及理。十難發明。是爲四分。所變相。以分別不生難者。以緣生理解。四緣十因十五依說緣義盡。生現生種說生義盡。以生死不相續難者。以業取習氣理解。習氣有三。名言我執及與有支。有支十二。初二能引。次五所引。次三能生。後二所生。如是前後展轉不竭。以境無三自性無爲難者。以性不離識解。虛空擇非擇。七眞如六法五事。四眞實四諦。三解脫。



二諦凡聖智境假實異不異。一切唯識。一切與三性攝故。以識有三無性無爲難者。以佛密意說解。依三自性立三無性故。是爲理教無難相。如是爲廣識相。次識性門。如眞如性卽唯識性。後識位門。五位修證。資糧加行。通達修習。及與究竟文勢易了。此姑不述。此論三分成立唯識。是故說爲成唯識論。是爲成唯識論。以識外無別實有爲宗義。

九莊嚴論者。括瑜伽菩薩一地法門。而以莊嚴大乘爲宗。三持十法。妙義難窮。更立伽陀。制爲此論。法門雖一。詮表不同。或詳或略。或能或所。或相或義。或常

或勝參觀互察義乃無遺。是故西域大小乘學悉以此論爲其根本。於此不通未可弘法。此論以莊嚴大乘爲宗者。一序分莊嚴。二菩提莊嚴。三教授莊嚴。四方便莊嚴。五功德莊嚴。序分莊嚴者。大悲度生立緣起品。八因證大立成宗品。勸入勝義立歸依品。瑜伽直敘本地故從所略。此論意在莊嚴故更加詳。是爲第一序分莊嚴。菩提莊嚴者。二無姓三十二喻種姓發心。瑜伽所略。莊嚴獨詳。菩薩地所學處其前四品。能所分別。瑜伽說所。莊嚴說能。後菩提品十四妙義。瑜伽所略。莊嚴獨詳。古稱此論微妙在是。比諸經論。

得未曾有。是爲第二菩提莊嚴。三教授莊嚴者。菩薩地所學法。瑜伽一品莊嚴。開六。瑜伽說所莊嚴說能。瑜伽說相莊嚴說義。趣入有基。七義明信。信必求法。十八義述求。求而弘之。十二義弘法。於此資深。邀如來教。二十五義教授。見佛聞法。從而思修。十一義隨修。修則業淨。四義業伴。此有六品。獨說教授莊嚴者。教前修感。前四惟感。教後起行。後一說行。正詮教授。唯此莊嚴。此之莊嚴。敘次有五。一者信修。劫滿授十地經。聞慧得果故。二者起心修住。蒙佛稱德。由聞入思故。三者善根入地。作諸功德。由思入修故。四者餘

地二智轉依利生修慧圓滿故。五者因大教授得大義利。勸入勝行故。是爲第三教授莊嚴。第四方便莊嚴者。菩薩地能修學有三方便。六度四攝爲自分方便。瑜伽詳七。莊嚴略一。供養親近無量爲勝進方便。瑜伽略一。莊嚴詳三。瑜伽大悲百十一苦所緣生起。莊嚴大悲三十六偈分別相用。菩提分品十五行爲內證方便。瑜伽詳事。莊嚴詳義。三乘根本覺分爲同覺分根本。念住爲獨。十四勝修於此詳說。五十三義成立刹那觀行無常。此義賅備。是爲第四方便莊嚴。功德莊嚴者。此之一品詳略均等。各隨所義異門詮。

次此姑不述。是爲初持功德。隨法究竟。瑜伽詳九。莊嚴略二。是爲二持三持功德。是爲第五功德。莊嚴是爲莊嚴論。以莊嚴大乘爲宗義。

十顯揚論者。錯綜瑜伽地要。而以顯教爲宗。有染有淨。然後有教。以染淨事攝瑜伽地攝事第一。既有教事。必有教義。攝淨義第二。教以四諦爲根本。但是苦集而非是染。但是滅道而非是淨。染淨是假諦之爲實。增諦而七。成善巧第三。教以四法印爲觀行。綜瑜伽義。詮染淨事。成無常成苦成空成無性。第四至第七。教爲聞熏。必極見道。成現觀。第八。現觀資糧。要先

思議成瑜伽第九不可思議尤應遠離成不思議第十最勝十相抉擇九事成攝勝抉擇第十一無著大悲救惡取空既請慈尊說瑜伽教復爲難持約文標旨說十一品階梯已得升進無難踴躍歡喜得未曾有。然有數義。此略抉擇染淨爲教。不稱染淨而稱攝事者。諸佛語言九事所攝。此之九事。雖是異門。然不離事。故名攝事。顯揚九事攝瑜伽十七地者。初之五事攝瑜伽境。次之二事攝瑜伽行。後之二事攝瑜伽果。爲詮染淨錯綜地義。不以地名。四盪栳南不稱無我品。而稱無性品者。翻顯無性。但爲無我。非一切無。

生空屬空。法空無我。雖簡二乘實詮法有。是爲顯揚論以顯教爲宗義。

復次說十支次第。若以造論人分別。應先之於彌勒。三論。廣大乘義莊嚴。應第一。觀唯識義分別。瑜伽應第二。成法相義中邊。應第三次。無著三論。立唯識宗。攝論應第四。立法相宗集論。應第五。闡十二分教。顯揚應第六。次世親四論。爲唯識宗作開導。依百法應第七。爲法相宗作開導。依五蘊應第八。爲唯識宗作廣論。二十頌三十頌。應第九第十。若以讀論人方便。爲二宗示階梯。應先之於百法五蘊。爲二宗示決擇。

應次之於攝論集論。爲二宗示根據。應次之於分別  
瑜伽辯中邊。爲二宗示廣義。應次之於兩唯識一雜  
集。爲二宗示別義。應終之於莊嚴顯揚。雜集雖廣。附  
庸集論。二十頌易。亦可提先。是爲讀論方便次第。  
復次說十支異名。百法名略。陳名數。五蘊名麤。陳體  
義。雜集名分別名數。廣陳體義。莊嚴名莊嚴體義。顯  
揚名總苞眾義。攝論名廣苞大義。中邊名摧邪顯中。  
二十唯識名摧破邪山。三十唯識名高建法幢。分別  
瑜伽名攝散歸觀。

十系第五



說十支已。次說十系。諸佛等流。依於言說。此土創教。是釋迦文。三藏十二部結集。賅全。然解深密說。佛一時中。惟爲聲聞。以四諦相轉正法輪。於二時中。惟爲大乘。依一切法。無有自性。以隱密相轉正法輪。於三時中。普爲諸乘。依一切法。無自性。性以顯了相轉正法輪。第三時。教一。兩普被。乘則有三。教唯是一。是故今所稟承。決擇最後。所遵經典。不濫他時。三時經中。其唯識六經。同瑜伽外。莊嚴詮德密嚴詮識。唯獨楞伽所說。具備。八識二無我。已樹唯識之幟。五法三自性。業開法相之門。十系所演。不出二宗。一脈相承。可

得而說。

一生補處。弘三時教。是爲彌勒。佛說稱經餘。惟稱論。彌勒五論。首是瑜伽。理無不窮。事無不盡。文無不釋。義無不詮。疑無不遣。執無不破。行無不修。果無不證。正爲菩薩。令於諸乘。境行果三。皆得善巧。勤修大行。證大菩提。廣爲有情。常無倒說。兼爲餘乘。令依自法。修自分行。得自證果。大本旣植。支義復提。顯立法相。說中邊頌。顯嚴大乘。說莊嚴頌。分別瑜伽。顯觀行說。金剛般若。顯實相說。五論立宗。罄無不盡。若空宗之有文殊。實此學稱爲初祖。

俱舍後應攝論二十五種三十唯識一切應觀然後  
開小入大舍常取勝於普被教功不唐捐雖攝論學  
猶有無性然羣奉世親謂爲正派彌勒無著作祖開  
宗光大門庭嗟世親學位雖未登地上功實等於提  
婆。

世親而後厥爲陳那有三妙論一正理門論論軌論  
式幽致未分爰暨理門重成規矩古於能立兼及宗  
等此唯因喻古於似立二十七過理門增二猶多隱  
義天主加四爲三十三然似破彈敵具十四類理門  
義當前後超倫二集量論唯識所變古唯見相更立

自證三分義詳。三觀所緣緣論極微無相和合無體  
體相具周。方稱現量。現量之境。乃是唯識。止此三論  
已。飲甘露。況更搜羅。妙味何極。誠賢劫之一佛奉瑜  
伽以周旋。

世親菩薩有兩派學。一已竟義。匯小歸大。融兩對法。  
安慧所得。二未竟義。推廣唯識。獨詮大乘。唯護法承。  
非護法義。異於世親。實未竟學。不同已竟。雖詮唯識。  
厥有十家。而能立義。周誰超護法。一者本有新熏種。  
容具二義。二者證自證。分四分成識義。三者器界隨。  
時變。根身各自變義。四者無色界中有定果色義。五

者依義。仗因託緣而得生住。是名為依。決定有境為  
 主。令心取自所緣。名為所依。種現相生。定非前後為  
 種子依。五具四種。六識唯二。七八互依。為俱有依。自  
 類非異。開前導後。為開導依。六者意緣藏識。見分非  
 餘義。七者決定染心。與八隨惑相應而生。義沈掉不  
信懈放  
忘散及  
不正知。八者無學無染。非無意依義。九者人天為憂  
 而非尤重。鬼畜憂苦。有純雜異。地獄純苦。三乘不攝。  
 憂喜樂三。決非無記義。十者六七心品。執我法者。是  
 能徧計。心熏習力所變二分。從緣生。故名依他起。依  
 斯執實有無。一異名所徧計義。諸所樹義。威蕤紛淪。

且舉方隅說此十義。世親以後唯此一人。誠日月之麗中天。堪以座於菩提樹下。

護法門人。勝友智月及與勝子。都善唯識。復釋瑜伽。八百餘卷。今得一卷。依以指南。然戒賢樹義。獨超時輩。如說五蘊無常。善根觀心。總一相現。是其相境。非現量攝。見道觀心。有五無常。一心五解。稱自相境。方名現量。妙義弘文。惜不多見。彌勒文殊。無著龍樹。護法清辨。戒賢智光。兩兩對稱。是法標幟。垂老奇疾。不取涅槃。傳法奘師。有逾誠懇。奘師聽講。瑜伽三遍。顯揚對法。正理一徧。因明聲明。集量三徧。中百二論亦

復三編如是諸部凡經五載。結西域之終。開東土之始。此學樞紐。是稱戒賢。

此土此學傳譯先聲。魏則佛陀扇多。隋則笈多。行矩。但譯攝論。未可稱最。張大譯事。厥有三家。一菩提留支。二毗目智仙。三真諦。三藏真諦揭典。十未譯一。要籍將全。起信玄文。二論而外。盛弘攝論。及與俱舍。然樹義多異。世親別支。瑜伽巨典。唯譯三卷。名決定藏。文多不暢。北涼劉宋。地持善戒。譯亦不良。而使甘露無飲。大法久空。哀痛愴懷。沈淪曷極。有玄奘法師者。悲深願切。誠重勞輕。絕漠萬里。淹留羈滯。十有七年。

文字語言。玄思奧義。頻於十死。擯於九難。而後瑜伽  
百卷得真。獲全。又譯場大德二十六人。網羅奇傑。曠  
世一時。誠所謂供養無量百千諸佛。機感奇緣。非稱  
苟簡。然奘師所譯七十四部千數百卷。視得梵本九  
分惟一。奘師著述。獨存唯識一量。八識規矩一頌。會  
中論制惡見論。凡六千餘頌。未畱一字。最足憾者。經  
則阿毗達磨。如來出現功德論。則分別瑜伽集量小  
乘則經部毘婆娑。朝夕所資。輒不獲覩。旁徵博采。矧  
冀其餘。古先哲言。東土多大乘根器。其諸必有豪傑  
奮然崛起。繼奘師後。



樊門多才。太賢元測。每樹異義。深密測疏。於今猶存。然昉尙光基。稱四大乘。恍若什門。睿融生肇。昉尙佚籍。光記俱舍。堪表一宗。若夫羣義發揮。要論都釋。百本之疏。猶存過半。惟我基師。恍惚如對。其糅厥古。先在成唯識論。其錄存師說。在法苑義林。其自所立教。大善因明流通五姓。則在因明大疏。法華玄讚。大論略纂。尤萃精華。泱泱東海。貽我至寶。研尋有途。不其懿歟。

基師之後。慧沼智周。承弘五姓。作慧日論。其了義燈。演祕俱詮。唯識亦有精華。至夫瑜伽著述。一切蕩然。

今所依倚有遁倫記猶資探討因流溯源自是以來  
微乎渺矣。

緒言第六

永明壽師作宗鏡錄敘次法相雖無樹義猶能詮釋  
古典具在依據不誣元末籍亡斯學沈響明人壁造  
勞而唐功遂使數百餘年治此宗者捨相宗八要唯  
識心要以外無別精研支離破碎之談戶牖一孔之  
見有天地之大而不能知有規矩之巧而弗獲用惟  
望此而卻走誰有事於瑜伽惟我親教深柳大師  
天縱之資一時崛起道咸之際舉國沈迷師以讀奇

書獲起信維摩於皖肆。浸假搜羅遂通三藏。由是發願。願法與劫齊。願人都法獲。私家刻經始於宋元之際。本次於明武陵方冊本。三於明清之際。密嚴嘉興本。隨成隨毀。蕩然無存。師創金陵刻經處。繼弟四之私藏。利有情以菩提。願其所學。由起信而淨土。由淨土而華嚴。華嚴尊疏鈔。疏鈔以唯識釋義。由是暮年深探法相。初於南條文雄氏得。因明大疏成唯識述記次第刊行。末遂治刻瑜伽。僅成其半。而慧日西淪。他日葉元盞問。瑜伽師地論後半若何。師對曰。以囑諸漸。數日寢疾。命三事筆以告同人。一繼刻瑜伽。二

作釋摩訶衍論集註三編等不等觀雜錄復速成大藏輯要附作提要而陸續以竟全藏今者等不等觀雜錄由徐文蔚編成瑜伽亦以機緣幸未辱命然是論刻成由終溯始已閱二十寒暑夫以無著請說之難奘師傳譯之難元明展轉刻而復毀之難今者重刻又如是之難敬恭作敘以誌其難其難已往由文字入實相庶幾其無難乃從而作偈偈曰。

彌勒未下生

法已先得聞

由聞而思修

三慧熏種成

發心速入地

平等轉殊勝

三學伏斷惑

轉依卽證眞

要由有門入

必持攝大乘

此學鬱千載

其籍東海存

讀已卽宣告

依法不依人

民國六年中秋編者宜黃歐陽漸識於金陵刻經處

吳堪遺貲百元刻此序連圈計字二萬一千八百

一十九箇支六十一元五角九分一釐又印送功

德書百本銀十元餘刻他書仗此功德懺障生天

高鶴年五元印送功德書五十本

民國六年中冬金陵刻經處識

研究部刻